

四庫全書

集部

欽定四庫全書

文苑英華卷五百九十九 宋 李昉等 編

請聽政

中書門下請聽政表三首

勸釋服聽政表三首

勸聽政表三首

宰臣等請聽政表七首

禮部為文武百官請聽政表二首

中書門下請聽政表

于邵

臣某言臣及文武百寮上乞奉遵遺詔俯垂聽政迨于再三尚阻羣請所天未覆何地自容伏自焦惶罔知攸處臣以因心之感是陛下私戚顧命之重是先帝至公未有因私戚而忘至公居大寶而懷小節者也且漢文昔王之賢者豈欲垂訓作則自虧其道而後嗣忘其孝思蓋所以垂時制禮從權體國千載不易直道而行曾參閔損俯就者家也周康漢景抑就者國也安以一家

之行而隳萬國之務乎今陛下禮以自拘闕為全孝臣
謂從而觀志存其中則明遺制不可徇禮而忽萬務不
可一日而曠臣又聞之子事父以無違臣事君以替否
臣陪陛下霑承末命臣言未感甘受不忠陛下固辭豈
得稱孝特乞受憑几之顧託損蓼莪之哀思以時闡皇
綱創帝範副人之所望悅億兆之心寧止宗社焉依實
將教缺速及披肝屢啓冀獲哀從無任崩迫彷徨之至

第二表

臣等欽承顧命遵守舊章冒陳至理上喧霄極冀迴三
舍以幸萬方而呼天未聞觸地無厝庶僚何恃而不恐
率土何仰而不憂至如仙駕在天玄猷未遠窮崩之慕
臣子之極同況陛下新離供養纏哀風樹誠不宜屢黷
嚴續仰傷聖心臣等備位台衡與國休戚所顧者小節
所全者大體是用頻煩干奏隕越為期臣某中謝竊以
三漢成規備乎六冊六宗遺範列在史官歷萃聖無以
易其儀貫百王無以更斯制則知聖人達節而俯就王

者屈已以徇時故周發誓師當未葬之日康王作誥繼
憑儿之辰夫大孝在於述先執禮懲乎發

疑作廢

命所以

伯魚止慟稟趨庭之規孝景抑情循易月之制弛張期
乎得中壓降在於適時今中夏雖寧而外郊猶警幸屬
千年嗣聖九有惟新顧循問豎之初迨今宅憂之日已
交牖魄不決外虞普天率土任重事殷一日暫曠萬務
所擁况翌日之詔手澤猶存敢忘尊揚以塞恩顧且小
大之理須稟聖規聽斷之期已違先旨庶政羣情惟上

帝之降命屬陛下以黎元宜以闡皇綱創帝範副靈祇
之望悅兆庶之心焉得極蓼莪之哀忽宗社之重伏惟
陛下仰思無改之道俯戒在予之責抑損至情覽決庶
務存萬代之固遺一介之善率繇大道克允至公天下
幸甚天下幸甚

第三表

臣某言稱情立制禮經美人道之文屈已從宜前史稱
我王之孝故魏文膈臆以莅事晉襄練經而從師誠有

由然非不懷也伏惟皇帝陛下屬當聖業纏思遺弓至
性出於自然孝情稟於天質雖考妣之慟被於含齒而
皇王之道寧有常心天下之志宜通太陽之照難闕况
百度惟始萬目未張遂叫帝闕期抑舜慕雖封章累至
而閭闔不開九服失圖羣司沮色豈悟至誠不昧有感
必通今日中使某至伏蒙昭迴天鑒允納窮款皇風廣
被神詔沛然觀象於天同伏羲之始畫奉先思孝狹武
丁之不言厥極

二字疑

愛於祖宗體前行之覆育周漢所

以繼理政術魏晉由是經綸理道實足垂風萬古作範
百王豁億兆惶惑之心示人祇聞奏之路百穀荷膏雨
之澤羣生覩天地之初以悲以歡載號載懼

云云

勸釋服聽政表

臣某等言再奉恩勅

一作旨

聖心永慕未忍割哀過大祥

則素衣練冠銜恤聽政當外除則降從禫服以終喪紀
者羣臣等重於荒迫之中頻奉不忍之詔精魂飛越兢
惶失圖臣某等中謝伏惟皇帝陛下孝心自天孝道逾

禮宅憂之日痛感人神顧命之文興言不忍微臣等前
後五表昧死上陳雖皇恩抑從而猶至十日自鼎湖昇
馭俯及祥除其間唯見羣臣禮展哀感又伏聞杖不能
起哭不絕聲常膳頓減至於一溢

一作併一

以王者之尊過

子臯之毀然臣等伏以三年之喪古稱云違禮者前王
之舊制也三日而聽政二十七日而釋服者先皇之遺

令

一作命

也今陛下不勝罔極之痛欲遂因心之哀遠追

前古之禮近廢無違之義愚臣荒塞莫知死所且梓宮

未遷於陵隧聖慮方切於哀號

一作
迷

雖釋服從

一作
臨

朝

慰撫臣子猶恐天顏慘戚率土不安羣臣未通庶事皆闕今方以練冠為易月之服禫制終諒闇之喪羣臣進見莫勝憂戚又安敢議及時政下延兆庶者哉遐邇幽明同知不可伏乞聖情深思園陵興作之務仰順先聖殷憂之說上尊祖宗傳襲之典精釋服之注俯從有司銜哀未懷豈有時日萬人之命懸在聖躬今臣等昧死請不奉詔上冒宸嚴心竄兢悸言辭失序無任憂國切

荒一作迫之至

第二表

臣等至哀至切昧死上表乞奉遺詔順時釋服日月有
期而精誠未達率土臣子未

類表
作莫

知所從况在朝行伏

待斧鑕臣等伏以昔漢文帝初制易月之禮以為帝王
者不可因喪而廢政若君上重服則率土何心爰建此
儀以重後葉自爾至今殆千載矣豈無哲王皆所尊奉
聖朝奄有四海撫寧萬邦重光睿圖孝理天下臣不敢

備引前古以煩聖聽

英華作德非

乞畧陳玄宗先帝即位故

事者老當日所聞見者皆以日易月依禮外除有司繼

存儀注尚在臣敢罔冒伏受嚴刑且先王制禮禫服止

於兩月為日正當兩日今詔旨降從禫服

類表作服

以終喪

臣雖固

類表作愚

陋不達禮本今服禫三載實所未聞况君

者天也豈有天意慘愴萬物得遂其性父懷隱痛赤子

得安其心哉陛下若固違羣言未奉遺詔非唯臣子哀

懼實恐蠻貊不安非陽和發生之道聖人順物之義愚

臣等心之所切抵冒國章形神悚越文理繁穢頻黷旒
宸庶感天心雖死之日將無所恨無任荒悚之至

第三表

臣某等言伏聞事有至公不敢避責確守臣節不敢逃
刑天心未從有死無二臣伏以代行皇帝憑几顧命俾
二十七日而釋服者蓋以天下事重軫慮于懷陛下至
孝一作情至純深必多損毀竊恐因創巨之痛忘艱難之業
累聖鴻緒萬邦赤子或一事不得其所豈非重服傷生

之患哉所以當大漸之辰託殷憂之命蓋緣社稷之遠

計須抑陛下之至情遺旨若此猶未忍割哀况一作無

制命則如何上請且攢宮尚臨於前殿陵寢方興於復

英華作厚非土朝野縞素殆將三旬雖聽政俯在於天心而

庶務未親其萬一今又禫服終制普告四方典章文物

何所設施一作將何所設且西戎北狄頃歲未賓涼秋氣高每

伺邊隙今若聞國有大故喪又未除姦謀或生事則非

遠一作遠慮雖皇威遐振應時掃除然思患之道一作前必戒

不虞善師不陣蓋在此也今陛下若御常服決大務不逾月之內天聲被於八極凡厥夷貊聳聽皇猷自然大者畏威小者懷德稽顙率賦疆場無虞告成之功上薦於帝則先皇帝之遺旨一作命行矣天子之大孝備矣羣下之所願遂矣萬國之兆庶安矣陛下不思此事之利害忍違臣子之誠心此臣等所以兢惶無措哀迫失圖叩心三請上冒天憲死而利國臣不敢辭臣之丹心天地明察無任兢迫之至

勸聽政表

陳諫

臣某言伏以大行皇帝尊揚天命付陛下以宗社託陛下以殷憂俾抑情以順人節哀以聽政伏惟皇帝陛下哀思至孝與天罔極不忍遵奉喪過乎哀羣臣上陳未蒙降允荒迫之至不知所措伏以上天降禍率土號慕哭泣之哀喪紀之節凡在臣子所宜同哀一作懷豈合此時再三陳請但四郊尚有師旅萬國未登和平衆事從宜兆人思理當通變之日非慕已疑之時陛下臨之決

辰則雍熙可覩廢之一日則憂慮或生所以遺旨殷勤
俾三日而聽政非欲抑陛下至哀之情蓋為社稷萬人
之計不得不爾也臣聞周稱成康漢稱文景咸為至理
之主百王則而象之然成王有顧命康王翌日而踐祚
文帝著遺令景帝釋服而視朝夫豈無私懷為至公抑
也伏惟陛下省當時安危之理順普天延企之望睿謀
光於八禁成天子不匱英華作遺之孝答先聖乃眷之情一作
懷九在生靈孰不悲戴臣等時逢繼聖位忝通班犬馬

之心不勝哀懇

第二表

臣某言臣聞先王立禮所以安邦國

一作國家

定社稷也帝

王喪制之義古今損益不同蓋時有安危禮有沿革當

萬邦無事可以諒闇屬百度思理固當節哀時殊事異

不得不然至於罔極之情

一作懷

孝思

一作因心

之感皆由率

天性隱痛深焉或不在喪服之輕重臨朝之遲速也臣

謹案孝經云事天明事地察德教加於百姓刑於四海

蓋天子之孝也又禮中庸曰武王周公其達孝乎夫孝者善繼人之志善述人之事者也臣等伏考前典保寧

家邦嚴薦胙

一作薦嚴社疑

於九廟流慶祚於萬葉此所謂繼

先皇之志也哀痛既往經營將來致干戈於不用登兆庶於壽域此所謂述先皇之事也陛下儻忘此二者未忍哀情固違百辟之誠請不咨前王之故實其若天地宗廟何其若萬方四海何臣等位忝班行同國所戚不任哀迫之至

第三表

臣某等言昔袁盎以漢文孝過於魯參臣今伏以聖情之慟過於漢文遠矣凡在羣下孰不歸仁臣等荒迫之中竊有所感伏以大行皇帝深惟天下之重憑几顧命俾陛下三日而聽政今顛顛萬國企聞王言已七日矣而銜哀永慕未忍抑從尚一作豈可謂奉先皇之旨行天子之孝乎大行皇帝封植萬邦傳之陛下屬艱難之運當金革之辰庶務權宜懸於晷刻如或一夫不獲一事

不理雖陛下心同大舜跡齊武丁豈可謂負荷祖業未

和一作

兆庶之望也

乎一作

臣等荒愚未見其可所以前

後三表血誠上請祇冒宸扆戰越伏深無任憂戚

一作感

之至

宰臣等請聽政表

林逢

臣等聞王者之孝不可與士庶同萬機不可以逡巡曠
典策所載古今必然伏惟皇帝陛下出震纘圖體乾御
極荷祖宗之丕烈啓運祚於雍熙自大故已來孝思罔

極天地以之慘戚臣庶以之震駭而節文有變遺旨無
違伏乞稍抑哀懷俯親庶政冀使生靈獲泰日月重明
臣忝列台司謬叅樞務無任懇悃之至

第二表

臣某言伏以萬機事繁不可久曠今則披瀝血誠乞親
庶政聖情哀塞未允愚衷夙夜兢憂是再陳啓伏惟皇
帝誕生欽明夙誠疑睿哲道光王室運屬承天而孝感
因心悲摧過毀一自國故殆逾半旬誠四海哀號如喪

考妣而萬靈顯若未覩乾坤伏冀思繼體之大猷棄執
哀之小節行帝王代天之法薄曾閔匹夫之情特抑哀
懷俯躬朝政宗廟之業永遂和寧社稷之靈知其允答
况事非為己道本徇公一作人仰惟聖慈俯塞羣望臣等
叨逢景運獲列樞衡昧死竭愚布露丹懇伏紙隕越庶
垂天鑒

第三表

此篇柳宗元集中誤收作第二表
晏元獻公云是林逢作決非宗元

臣伏奉大行皇帝知陛下至性自天恐陛下執哀過毀

上惟九廟之重下念萬務之殷故遺詔丁寧俾遵舊典
今百辟卿士顛然在廷瞻望清光已七日矣固陳誠請
猶未允從內外憂惶莫知所出臣聞大孝之本繼志為
難酌禮之情尚柳集中為貴是以哀迷期數哭泣有常

俯而就之聖人所重知難繼也君子不為伏願少抑哀
情柳集仰尊理命以副神祇之望以安億兆之心光祖

業於無窮流德教於千古

柳集作化於天下

凡在臣子孰不悲

戴不任哀懇誠切之至

第四表

此篇亦誤入柳宗元集作禮部為文武百寮請聽政第三表按表文云兩河之冠盜雖除百姓之瘡痍未合乃是穆宗敬宗時事宗元元和十五年卒誤收何疑

臣某等言伏以萬機事

柳集作至

重遺旨難違再獻表章上

塵旒宸精誠徒竭天意未迴內外遑遑人神企望臣聞

王者之孝異於匹夫禮不相沿道資適變向

柳集作當

承平

之代故殷帝宅憂而不言遇有事之時則周王未葬而

誓衆况今戎車猶駕邊候多虞兩河之寇盜雖

柳集作難非

除百姓之瘡痍未合亂者思理危者求安天下嗷嗷正在今日誠宜抑其至性以副羣心成先帝之大功繼中興之盛業豈可寢苦啜泣庶政闕然九廟之靈何報萬方之望何塞臣等職參樞近誠切邦家若陛下未忍臨軒尚持前志臣等有死而已不敢奉詔不勝哀迫懇切之至

第五表

臣聞樹之元后以牧蒸人猶日月之照臨不可以少曠

如天地之覆育不可以暫虧故歷代明王取鑒於此必
屈己以徇物遂抑哀而從宜期為彝章行於往古聖心
哀迫未體至公羣臣憂疑罔知所措伏惟皇帝陛下溫
恭允塞邁德文明承二百年之丕圖當十三聖之大業
生靈所屬負荷不輕豈宜直疑貌棘心蹈小節而自遂
寶符神器委大計而未臨且萬機事殷九有望切運當
克構政在惟新颺颺蒼生日有所冀伏乞皇帝以安黎
庶為念以保社稷為心對越上玄克揚顧命俯從人願

用答天休臣之悽悽實在於此况萬國將至七月匪遙
須務山陵以申孝敬在於營奉不可曠違抑有前規固
無徇已伏惟特膺順變允叶情文抑至性而副羣誠畧
小善而章大道則天下幸甚宇內和寧臣等生忝明時
位當樞軸敬同羣品重啓宸嚴悃悃之誠至於死請云
云

第六表

臣等昧死上表以陳備竭肝膈聖情超遠未蒙聽覽臣

等中謝臣等謬膺燮贊猥奉恩私未迴日月之光是負
股肱之寄豈臣心不忠無能感寤今者萬機之曠四海
同憂顛顛衆心不安寢食以陛下聽政之期未尅執喪
之志尚堅臣等當伏閤叫一作扣關殞身碎首所期宸鑒
下察微誠不勝迫切之至

第七表

臣等言今日日已後累陳七表請御萬方忽蒙宣旨尚
未聽許臣等驚怖不知所裁敢微前言以奉萬一伏惟

漢朝諸帝文稱明聖而著易月之典以為後代之法光武已降迄于我唐繼有睿哲之君不無明聖之主豈皆乏殷宗之孝豈盡無陛下之心但以所守者祖考之丕圖所臨者生靈之重事不敢徇其己以屈萬姓不欲申其志以盖百王具在典謨莫得逾越况元和已前十一聖矣皆以孝理化於萬國迭承次守無議改纒大行皇帝恭承昌緒亦尊前訓當陛下舊規或墜忠言莫從遠棄漢文之風烈近乖先帝之遺躅獨徇一時之至性臣

恐掩祖宗之舊儀不足以流範越大行之性度不足以揚名夫喪以敬為上哀亦次之著在禮經陛下之所鑒也伏惟以社稷為心以邦國為念以奉山陵為至敬以安社稷為至勤薄曾閔之菲名纂堯舜之盛業副中外之丹款濟蒼生之血誠臣等悽悽不寧寢食况臣等備任宰衡時逢昌運答先朝之眷遇承陛下之文明伏乞俯察愚心允茲羣望期於得請昧死上陳今樞務之目曠廢已久朝野心感人祇望切安可盤桓更延時日伏

乞更賜允許以慰上下億兆之誠立俟聖諭晷刻是望
無任

禮部為文武百官

集作
寮

請聽政表

柳宗元

臣某等言臣聞大道必體於至公大孝無

集作
莫

高於善

繼上觀列聖旁考前王罔不俯就禮文仰承大事嚴奉

宗社

集作
廟

慰安黎元然後德教惟新邦家永固伏惟皇

帝陛下寢苫泣血號慕無時貫於

集作
于

神明動于天地

未臨庶政猶狗至誠凡在人臣孰不哀懼伏以

集作惟

先

聖遺旨俾陛下抑哀而聽政本朝乏人使臣等竭忠而

集作以

奉上非敢懼死輒布懇辭期於必從以慰寰宇且

王業至重軍國方殷一日萬機

一作萬機之事

不可暫闕伏願

追遵顧命蹈履成規恢王者華夷之望順上帝乃眷之
懷臣等不勝哀迫誠懇之至

第二表

臣某等言臣聞聖凡殊途邦家異禮故王者捨己從物

用身許天雖居達喪猶以事奪伏以代行皇帝道成鑄鼎仙等馭龍萬姓長號九有颺望陛下以聰明睿聖嗣守寶圖爰及宅憂迨茲累日而孝思罔極尚輟乃讜之言庶政未釐頗闕如絲之命臣等嘗覽載籍粗知喪紀若成周顧命歷代猶遵西漢遺詔前王所奉我國家以孝理天下文明應期上類表用此法胥以傳授蓋事歸至當則不可不遵禮貴從宜則不得不守理固然也臣等是敢集作以陳愚懇輕黷宸嚴冀遂血誠俯親國政

而陛下執喪逾切聽理未聞億兆嗷嗷不知所訴臣以
為天子之孝在於保安社稷司牧蒸黎功超百王慶流
萬代亦何必守臣下之小節蔑皇王之大猷固阻羣情
務成謙德伏願以遺詔為念奪在疚之懷就臨軒之制
天下幸甚幸甚不勝哀惶懇迫之至

文苑英華卷五百九十九

欽定四庫全書

文苑英華卷六百

宋 李昉等 編

請勸進及封岳行幸

勸進梁元帝表二首

請復子正位表一首

為齊州父老請陪封禪表一首

為朝集使于思言等請封中岳表一首

請許封泰山表一首

百官請不從靈駕表一首

在神都留守請車駕還洛表一首

諫則天幸三陽宮表一首

李採訪請駕停金牛一日表一首

為京兆第五尹請車駕迴西京表一首

勸進梁元帝表

徐陵

臣陵言臣聞封唐有聖還承帝嚳之家居代維賢終纂
高皇之祚無為稱於革鳥至治表於垂衣而撥亂反正
非聞一作前古至如金行重作源出東莞炎運猶昌枝

分南頓豈得掩顯姓於軒轅非才子於顓頊莫不因時

多難俱繼神宗者也伏惟皇帝陛下出震等於勛華鳴

謙

一作明讓

同於旦奭握褒秉鉞

類聚作握圖執鉞

將在御天玉騰

一作勝

珠衡先彰

類聚作章

元后神祇所合

一作命

非惟太室之

祥圖謀

一作畫類聚作書

斯歸何止堯門之瑞若夫大孝聖人

之心中庸君子之德固以作訓生民貽風多士一日二

日研覽萬機允文允武包羅羣藝擬茲三大賓是四門

歷試諸難咸熙庶績斯無得而稱也自無妄為象鍾禍

上京梟獍虔劉缺宗蕩墜銅頭鐵額興暴皇年

二十四
字一作四

無妄為暴
皇祚寢微

封豨脩虵行災中國靈心所宅下武其興望

紫極而行

一作長

號瞻丹陵而隕慟家寃將報天賜黃鳥

之旗國害宜誅神奉玄狐之錄

一作錄

尅李軼於河津征

陶謙於海岱滕公擁樹

一本作面擁蓋避諱也
出漢書滕公夏侯嬰傳

雄氣方

嚴張繡交兵風神彌勇忠誠貫於日月孝義感於冰霜

如雷如霆非貌非虎

一作如
貌如虎

前驅致命元惡斯殲既挂

膽於西州方燃臍於東市蚩尤三塚寧謂嚴誅王莽千

段一作刺非云明罰青羗赤狄同界狼豺胡服夷言咸為

京觀邦畿濟濟還見隆平宗祀一作廟惜惜方承多福自

氛一作氤渾沌之世驪連粟陸之君赴起龍圖文因鳥

跡雲師火帝非無戰陣之風堯誓湯征咸用干戈之道

星躔東井時破峭潼雷震南陽初平尋邑未有援三靈

之已墜救四海之羣飛赫赫明明恭行天罰莫如當今

之盛者也於是卿雲似蓋晨映姚鄉甘露如珠朝垂原

一作華景寢芝房感德咸出銅池冀莢伺辰無勞銀剪重以

東漸玄兔西踰白狼高柳生風扶桑銜一作盛日莫不編

名屬國歸貢一作質鴻臚荒服來賓遐邇司慶一作福其文

昭武穆附萼也如彼天平地成功業也如此久應旁求

掌故一作固詢詔一作諸詢天官斟酌繁昌經營高邑宗一作宋非

王啓霸非勞武德一作陽武之侯清蹕無虞何事長安之邸

揚龍一作鑿旂以饗帝御鳳屐以承天歷數在躬疇咨一作

與為讓去七月二十四日兼散騎常侍柳暉等至鄴伏

承聖旨謙冲為而不一作弗宰一作或云洛一作淫非陽未復函谷

無泥旋駕金陵方膺天睠愚謂大庭少昊非有定居漢

祖殷宗皆無恒宅登封岱嶽且署

一作摛置

明堂巡狩荊州

一作章陵

時行司隸何必西瞻虎踞

一作據

乃建王宮南望牛

頭方稱天闕抑又聞之玄珪既錫蒼玉無陳乃棧樸之
愆期非包茅之不貢雲和之瑟久廢甘泉孤竹之管無

聞方澤豈不懼歟伏願陛下因百姓之心振

一作極

萬邦

之命豈可逡巡固讓方示石戶之農高謝為君

一作君臨

徒

宏箕山之客未知上德之不德惟見聖人之不仁率土

翹翹蒼生何望昔蘇季張儀違鄉負俗尚復招三方以

事趙請六國以尊秦况臣等預

一作顯

奉皇華親承朝命

珪璋特達通聘河陽貂珥雍容尋盟漳水加牢貶館隨

世一作勢

汙隆瞻望鄉闕

一作關

誠均休戚但輕生不造命

與時乖等

一作忝

一介之行人同三危之遠擯承閒內殿

事絕耿弇之因

一作思

封奏邊城私等劉琨之哭不勝區

區之至謹拜表以聞

同前

沈炯

臣僧辯等言衆軍以今月戊子

英華作
午非

惣集建康賊景

鳥伏獸窮徒為擊搏

一作類
擊類挫

力

一作
姦

竭詐盡深溝自固

臣等分命將士

一作分
勤武旅

百道同趨突騎短兵犀函鐵楯

結隊千羣持戟百萬止紂七步圍項三重轟然大潰羣

兇殄

一作
四

滅京師少長俱稱萬歲長安酒食於此價高

九縣雲開六合清朗矧伊圓

一作
然

首誰不載躍伏惟陞

下咀痛茹哀嬰憤銜

一作
思

酷自紫庭絳闕胡塵四起恒

山易水

一作
垣好疇

冀馬雲屯泣血思治

一作
治兵

嘗膽誓衆而

吳楚一家方與七國俱反管蔡流言又以三監作亂西

京義衆阻強秦而不達

一作通

并州遺民跨飛狐而見抵

一作泯

豺狼當路非止一人鯨鯢不梟倏焉五載雄

一作英

武克振哀

一作怨

耻並雪不申

二字一作未尋霜露如何可言

臣等輒依

故實奉脩祖廟

一作廟社

使者持節分告園

一作塋

陵嗣君升

遐龍輶失

一作未

殞承華掩曜梓宮莫測並隨局

一作並即隨由

備辦禮具凶荒四海同哀六軍祖哭情敦孝友理增

一作

當感慟日者百司群岳

一作岳牧

仰祈宸鑑以析

一作錫

珪之

功既歸有道當璧之禮又

一作九

屬聖明而優詔謙冲宵

或作寂

然凝邈飛龍可濟

一作躋

而乾爻在四帝闢云叫而

閭闔未聞謳歌載馳是用翹首所以越人

類聚英華作楚人非

固

執煉丹穴以求君周氏樂歸

一作推

越

一作踰

岐山而事主

漢王不即位無以貴功臣光武思蕭王

一作不止戈

豈謂紹

宗廟黃帝迷

一作遊

於襄城尚訪治民之道放勛寂

一作入

於姑射當

一作猶

使蹲俎有歸伊此儻來豈聖人所欲帝

王應運

一作所應

可不其然

一作已而然不獲

伏讀璽書仰承

一作尋諷

制旨顧懷物外未奉慈衷陛下日角龍顏之姿表於狗
齊之日彤雲素氛之瑞基於應物之初博覽則大哉無
所與名深言則騁乎昭章之觀忠為令德孝實動天加
以英威茂略雄圖武筭指麾則丹浦不戰顧眄則阪泉
自蕩七十六字英華作陛下孝實動天忠為令緒加以威窮則板泉自蕩非地維絕而重
紐天柱傾而更植鑿河津於孟門百川復啓補穹儀於
一作五百萬物再生縱陛下拂袵衣而遊廣成登弁山
而去東土羣臣安得仰訴兆庶何以歸仁况郊祀配天

壘觴一作禮曠齊宮清廟邊豆一作匏竹不陳仰望來一作鑿

與匪朝伊夕瞻言法駕載渴且飢豈可久稽衆議有曠

彝典一作况舊邦凱一作復函洛已還一作高陵櫟

陽宮館雖敗一作榮一作河清洛一作佳氣斯在一作

臯門有伉其泉四敞土圭測景仙人承露斯蓋九州之

宇縣六合之樞機博士奉一作圖書而稍還太常定禮

儀而已立一作豈得不揚警蹕一作而赴名都振一作

玉鑿而旋正寢昔東周既遷鎬京遂其不復長安一亂

陝洛永以為居

英華作不以為君非

夏禹以萬國朝諸侯文王以

六州匡天下方之

一無方之二字

王一作跡

基百里劔拔

一作杖

三

尺以殘楚之地抗拒六

一作九

戎一旅之卒

一作師

剪夷一作

滅

三叛坦然大定御辯

一作鞏

東歸解五牛於冀州秣六

馬於譙郡緬求前古可得比歟

一作其可得歟

對揚天命何所

讓德有理存焉敢重所

一作所

奏臣僧辯等誠惶誠恐頓

首頓首死罪死罪

請復子正位表

蘇安恒

此篇唐書作疏又載六百九十四卷封建門題作
請皇家諸孫姪疏

為齊州父老請陪封禪表

駱賓王

臣聞元天列象紫宮通北極之尊天

集作大

帝凝圖玄猷

暢東巡之禮是知道隆克澤

集作光宅

既輯玉於雲臺績劬

集作業紹

禋宗必塗金於日觀云云伏惟皇帝乘乾握紀纂

三統之重光御辯登樞應千齡之累聖故得河浮五老
啓赤文於帝期海薦四神奉丹書於王會瑞開三脊祥

洽五靈既而緝總章之舊文拮辟雍之故事非煙翼軼

移玉輦於梁陰若月承

集作乘

輪祕金繩於岱嶽臣等質

均芻狗陰謝柔榆幸屬堯鏡多暉昭餘光於連石軒圖

廣運

集作耀

追盛禮於擬金然而鄒魯舊邦臨淄遺俗俱

穆二周之化咸稱一變之風境接青疇俯瞰獲麟之野

山開翠岵斜連辨馬之峯豈可使稷下遺叱頓隔陪封

之禮淹中故老獨奏

集作奉

告成之儀是用就日披丹御

璧輪之三舍望雲扞素叫天門

集作關

於九重儻允微誠

許陪大禮則夢瓊餘息翫仙閣

集作仰
仙闕

以相驩就木殘

魂遊岱宗而載躍

為朝集使于思言等請封中岳表

崔融

臣某言臣聞易有太極是生兩儀有父子焉有君臣焉
道莫尊於三皇皇合符於奕葉德莫高於五帝帝展事
於云亭禮莫盛於三王報功於岱畎政莫隆於兩漢紀
號於仙閣皆所以省方觀人增天益地刻玉篆印金泥

激清流於滲漉翔仁風而萌動然則業隆不封禪何以
答三靈道備不巡遊何以會萬國為人上者可不敬哉
中謝伏惟聖母神皇陛下寶命緼縕立期盼蠻包混元
而建極宅造化而開階剖靈符於天合至德於地溼澤
浸潤萬物恩光明懸四海不言而含氣風從無為而流
形日用允所謂榮鏡絕代禪壓振古者焉臣聞古之聖
王受命者然後得封禪又云功成道洽符出乃封又云
致太平必封禪今陛下獲瑞銘於廣武得寶圖於溫洛

星連月合雲起風搖上以擁神休下以塞天望崇徽號
定都邑文質再而復正朔三而改義在得天乃立天統
非受命者孰能臻茲因時創宜以順制逆建三廟崇五
堊廣太學以教胄子開明堂而祀上帝彼東夷西戎南
蠻北狄殊方絕界窮幽極遠蠢然莫敢不來享莫敢不
來王非功成者孰能臻茲三階平萬方晏巖廊無事圉
圉云空獄訟清而王風淳禮樂和而人氣樂衢路有鴈
行之序邑里得鶉居之時五尺童兒羞論霸道八十父

老不知帝力非道洽者孰能臻茲乾符總集不召而自
至坤瑞昭昇應圖而合謀慶雲出神池涌毛宗擾羽族
馴樹連理而麥兩岐闕黃黍而闕玄秬匪朝伊夕以時

繼年非符王者之瑞孰能臻茲命既受於天矣功既成
於人矣道已洽於古矣符已出於今矣若此者非太平
之効歟可以升中名山可以肆類上帝嵩高維岳峻極
于天風雷所起設險於畿甸霜露所均作鎮於邦國雖
復千八百處未常遊玉女之臺七十四家不能幸仙人

之洞區區漢武止聽三呼汲汲晉炎但誼羣議臣等竊
以為祕籙有云中岳之神姓武天意若曰神皇其封中
岳乎藏織緯以須時蓄符祥而待聖顯見神跡覺寤黎
蒸天祚岳姓必將封祀祀岳者非陛下而誰由是王公
侯伯日夕登封之奏禮官博士歲時符命之書鴻儒碩
學思獻儀於野外川石山祇願前駐於闕下天人之望
久矣陛下何得而辭哉伏乞深惟至公仰祇靈睠傍稽
瑞命俯順叱歌龍駕帝服背河洛而上泝星陳天行指

輦嵩而東邁石芝生而五色可以為盛貝樹長而三

可以為籍埋玉報地燔柴告天載巍巍扇翼翼上以答

昊穹之儲祉下以副率土之歡心永保鴻名長為稱首

盛矣美矣猗歟偉

一作
那

歟臣等忝職外臺受委方土宣

太平之風化聽古老之謳謠望屬車而未來思叫

一作
扣

闈而至極庶千年一會陛下垂不讓之恩使五載四朝

羣臣有慶成之地孰不辜甚不勝悃欵之至謹詣朝堂

奉表誠請以聞

請許封泰山表

已見五百五十六卷

張說

百官請不從靈駕表

李嶠

臣嶠等言伏以靈駕道

疑作遵

途聖恩攀從國計非使羣

臣不安冒昧上祈未蒙哀允跪對還旨載深惶惕臣嶠等中謝臣聞古者天子上法天心不極私情違衆欲以順人理國為孝以克己制心為禮是故凡聖異禮公私殊制私心獨展凡人之孝也萬姓咸若聖人之孝也陛下行堯禹之事以萬姓為心奈何守曾閔之節懷獨展

之願臣等囂

闕

竊所未曉且永淳已後關輔流散近適

旋定人猶未足今山陵起築役徒惣萃彌春涉夏為費
宏多若陛下此行羣司畢從於人取給臣實難之水旱
小憊農慮非淺東都則水漕淮海易資鹽穀之蓄陸走
幽并近壓戎夷之使朝命新復人望安在宜應靜鎮未
可移動陛下若俯順羣願留撫都人則其安如此若不
勝私情攀奉靈駕則其慮如彼况扈從兵馬既不預集
行宮廩蓄又未先備發期俯邇支計闕然倉卒敦迫必

不敢辨若待陵寢安厝霜露終感三農歲稔萬乘時巡
奉郊廟以展虔瞻日月其何遠今固將杼私戀棄羣言
忘人力蔑國用此實非陛下安集新業之故亦非先后
憐憫遺人之意且朝廷故事典章猶在獻陵追遠太宗
不至於三元昭陵上遷高宗不至於九峻豈先帝私懷
不堪故事羣臣公議之所奪也伏願仰遵舊訓顧定新
基屈至情而順羣心抑小節而成大孝使軍國長筭函
洛皆安邦甸窮人賦斂少減萬姓翹望實深至願百寮

結誠期於死請無任悲迫之至謹詣朝堂奉表固請以
聞

在神都留守請車駕還洛表

臣嶠等言臣聞天下皆春而燕谷有祈暄之律日中並
照而彭澤有隨陽之禽豈非承光飲和仰德廷鹿二字疑

深於戀者其往若不親渴於求者其來如不足以圭表

既宅關河馳怨思之誠鑿和未巡襄鄧切謳歌之慕帝

車北指震

疑

駕西臨槐檀已歷於四時舊茂

二字疑

猶淹

乎八水耆

一作大

老延頸簪裾企望戴天有分徒嗟京兆

之遙捧日無階竊恨長安之遠臣嶠等中謝伏以載祀

七百卜年非豐登

疑作鎬

之地時乘九五啓聖由瀍洛之

鄉所以受龍圖龜書所以朝雨師河伯叶祥符於讖錄

採謀議於人鬼萬靈幽贊百物阜昌是曰天地之心實

興帝王之祚方使四夷為守西賓屈無外之談六合為

家東土壯居中之業况復圓丘方澤神祇之兆域以安

複廟重檐昭穆之尊卑既叙定社而立稷建邦而設都

是萬年長王之郊誠億載不遷之宇寧可久曠中壤卽
安偏據詠山河於漢舊訪宮室於秦餘五載時巡曾無
告至之禮四方述職仍以不均之患臣等庸愚竊所未
達今三秋告稔萬寶已成陰陽所和一作有稼穡徧茂却

連澤潞汾曲叙廟荆揚海隅萬庾同殷千箱一作斯並詠

禾萌一作箱九穗未曰休徵穀石五錢詎名豐穰加以舟

車並湊水陸交衢物產尤多觀聽胥悅衆庶有來蘇之
冀神靈翹望幸之心伏願陛下俯察氓謹仰祇天意因

銅省

疑作雀

之稔歲命玉鸞之仙軫洎時擇日屯萬騎而

出函秦省俗觀風撫四人而還鞏洛逍遙乎九阿之阻

容與乎八表之路迴輿駐蹕觀十月之圃場闢續凝旒

問百年之疾苦然後歸格道乎

疑

九廟

疑

明堂衆星拱

列長居辰極之尊萬寓駿驅

闕

詠朝宗之俯光輝將日

月齊殷德澤與江河比潤致乾坤之景福盡億兆之歡

心凡在人祇孰不欣幸臣等限以所守不獲親詣闕庭

無任區區之誠謹附洛州奏事使朝議郎行洛州司兵

參軍盧正言奉表陳請以聞

諫則天幸三陽宮表

後篇作疏

張說

久視元年
為右補闕

臣說言臣聞明王

集作主

不惡切陳以博覽忠臣不敢隱

忠以曲辭伏願陛下特

集作少

加裁察臣說誠惶誠恐頓

首頓首死罪死罪陛下屯萬乘幸離宮暑退涼歸未降

還旨愚臣固陋恐非長

舊唐書作良

策請為陛下陳其不可

三陽宮去洛陽城一百餘

後篇集本作一百六十

里有伊水之隔

崿坂之峻遇涉夏秋

集作過
夏涉秋

水潦方積道壞山險不通

轉運河廣無梁咫尺千里扈

集作
擁

從兵馬日費資給連

雨彌旬即難周濟陛下太倉武庫並在都邑積

後篇集
本作紅

粟利器蘊若丘山

後篇作
山積

奈何去宗廟之上都安山谷

之僻處是猶倒持劔戟示人罽柄臣竊為陛下不取夫

禍敗

後篇集
本作變

之生在人所忽故曰安樂必戒無行所悔

此不可止之理一也告成

英華及集本
作部城非

褊小萬方輻湊

填城溢郭併挿

集作
鍾

無所排斥居人蓬宿草次風雨暴

至不知庇託孤惇老疾

唐書後
篇作病

流轉衢巷陛下作人父

母將若之何此不可止之理二也造設

後篇作池臺
唐書作池亭

竒

巧誘掖上心鑿山䟽觀

後篇唐書
荆巖起觀

竭流漲海俯貫

集作
窮

地脉仰出雲路

集作
端

易山川之氣奪農桑之土延木石

運斧斤山谷連聲春夏不輟勸陛下作此者豈正人邪

詩云人亦勞止汔可小康此不可止之理三也御苑東

西僅三十里

集作二
十里所

出入來去

後篇唐
書作往

雜人甚多外無

墻垣扃禁內有榛藂谿谷猛獸

後篇唐書
集本作殺

所伏暴慝是

憑陛下來往

後篇唐書
作往

輕行警蹕不肅歷蒙密乘險噉

卒然有逸獸狂夫

後篇作
奔突

驚犯左右豈不殆哉雖萬全

無疑然人主之動不宜容易也易曰思患豫防願陛下

為萬姓持重此不可止之理四也今國家北有胡寇觀

後篇
作窺

邊南有夷獠騷徼關西小旱耕稼是憂安東近平

輸漕方始臣願陛下及時旋軫深居上京息人以展農
脩德以來遠罷不急之役省無用之費澄心澹慮惟億
萬年蒼蒼羣生莫不幸甚臣自度芻議十不一從何者

阻

唐書集作阻

盤遊之娛間林沚之玩規遠圖而替近適要

後利而棄前驩未沃明主之心已捩

後篇作拂唐書作戾

貴臣之

意然臣血誠密奏而不愛死者不願負陛下言責之職

耳輕觸天威伏地待罪

此篇又載六百九十四卷今已削去

李採訪請駕停金牛一日表 常 袞

臣某言臣聞葵藿何稟猶每傾陽犬馬無知尚能戀主
伏惟陛下迴鑾巴蜀指旆咸秦萬乘雷奔經劔門之險

阻六宮雲從歷棧道以崎嶇恐天步有厭於登臨聖躬
蹙勞於行幸稍移玉輦將至金牛漢水梁城郡當所守
蜀門秦塞路則居中乃微臣廁侍從之時宜陛下休羽
儀之地伏望小停仙蹕寬一日之程蹙奉宸居喜千年
之遇臣忝陪宗室得備藩條懇款之誠倍萬怕品無任
攀戀屏營之至奉表陳情以聞

為京兆第五尹請車駕廻

一作還

西京表

于邵

臣某言臣聞古公去邠初因避狄襄王出鄭終見興周
故能成九五之尊享八百之祚載在前史昭然可知伏
惟元聖文武皇帝陛下道合四國威加八紘一作高啓中

興之運宏下武之功殊方異俗重譯交順惟犬戎小醜
敢亂天常陵逼豐鎬震驚都邑陛下理兵陝服遣將秦

川鳴張未幾狗游自溺今八川底定萬姓怨思同一作皆

懷奉一作捧日之誠共結屬車之望况地稱百二勢比咽

喉足以橫制九圍財成六合陛下豈可捨山川之固為

巡省之遊臣雖至愚竊知不可伏願謀及百辟俯徇羣
心廻鑿舊宮駐蹕西夏使百川有朝宗之所衆星復環
拱之方凡在有一一作肖形孰不幸甚無任懇歎涕戀之至
謹遣官奉表陳情以聞



文苑英華卷六百

欽定四庫全書

集部

文苑英華卷六百三一至

詳校官給事中臣李臺

助教臣常循履勘

總校官進士臣朱鈐

校對官中書臣胡紹基

謄錄監生臣李維瀛

欽定四庫全書

文苑英華卷六百一

宋 李昉等 編

陳情

一陳情表二卷英華所編
失年代先後今再之

陳情表一首

為人陳情表一首

陳情表一首

為水潦災異陳情表一首

為任虛白陳情表一首

陳情表一首

陳情表三首

初至益州上訖陳情表一首

辭上滑州刺史陳情表一首

為崔僕射陳情表一首

代高尚書陳情表一首

為趙侍郎陳情表一首

陳情表

陳文帝時

沈烟

臣嬰生不幸弱冠而孤母

英華作
諸非

子零丁兄弟相長謹

身為養仕不擇官承襲朝命偶在亂世

一作宦成梁
朝命存亂世

冒

危履險自死輕生妻息誅夷昆季屠

一作

滅但餘老母

一作餘
臣母子

得逢興運臣母妾劉今年八十有一臣叔母妾

丘七十有五私

一作
臣

門弟姪故自無人妾丘兒孫又久

亡滅兩家侍養餘臣一人前帝知臣之孤筑眷臣以州

里不欲使頓居草萊又復矜臣溫清所以一年之內再

三休沐臣之屢披丹欸頻冒宸鑒非欲苟避

一作

朝廷

遠離畿輦一者以年將六十而湯火居心每跪讀家書
前懼後喜溫枕扇席無復成童二者職居彛憲邦之司
直若自虧身禮何問國章前德綢繆始許哀放內侍近
臣多悉此者正以選賢與能廣求明哲趨趨荏苒未始
取才而上玄降戾奄至今日德音在耳墳土遽乾悠悠
皇天哀此困一作極兼臣私心煎切彌迫近時悽悽之
祈轉忘塵觸伏惟陛下睿德聰明嗣興下武刑于四海
弘此孝治寸管求天仰歸帳一作宸有感必應實望明

時一作聖明特乞霈然申其私禮則王者之德覃及無方矧

彼翔沈孰非涵養云云

為人陳情表

陳子昂

臣某言臣門衰祚薄少遭險釁行年三歲嚴父早亡慈

母鞠育哀惇相養臣又疋羸少多疾病集作疹零丁孤苦

僅得成人老母慙一作憫臣孤薄恐不能負荷教誨師氏

訓以義方家貧無資績紡集作紡績以給束修衣褐並出母

指臣既無姊妹寡有兄弟衡門獨立惟形與影母子相

視惇惇靡依罹此艱虞歷二十載臣稍以成立忝跡朝

班薄祿微資始期色養私情獲遂集作既獲母子同集作相歡

殃罰不圖老母見背攀號何及泣血漣漣于時日月非

便集作宜權殞京兆歲序速遷於今若干年臣本貫河東

墳隧無改先人丘壠桑梓猶存而老集作亡母客居未歸

舊土宿草滋蔓集作成列拱樹荒涼興言感傷增以崩咽今

卜居宅兆將入舊塋明年吉辰最是良便過於此際未

有尅期臣諺齒王人職在驅役今歲奉使已至居延單

行虜廷絕漠千里臣雖萬死無答鴻恩恐先朝露有負

老母

集作眷知

伏惟陛下仁隱自天孝思在物哀臣孤苦降

鑿幽微

集作眞

使臣來年得營葬具且斬草舊域合骨先

墳保送羈靈獲申子道烏鳥之志已

集作獲

遂私情遷舉

事終

集作遷定事早

馳影奔赴雖其

集作即

殞歿甘心無恨

集作憾

云云

陳情表

高宗

員半千

臣某言臣貧窮孤露家資不滿千錢乳杖藜糗朝夕纔

充一飯有田三十畝有粟五十石聞陛下封神嶽舉英

才

唐書作豪英
一作英才

貨賣以充糧食奔走而歸帝里京官九

品無瓜葛之親立身三十有餘志懷松柏之操不能糴

賤販貴取利於錐刀斟酒隻雞求舉將何以辦投匭進

欵奉勅送天官捧以當心似懸龍鏡家之以守若戴黿

山於今立身未蒙一任臣恨不能益國死將以選地不

賜臣一職剖判疑滯移風易俗以報陛下深恩若使臣

平章軍國燮理陰陽臣不如稷契若使臣十年成賦一

代稱美臣不如左太冲若使臣荷戈出戰除兇去逆臣
不如李廣若使臣七步成丈一定無改臣不愧子建若
使臣飛書走檄援筆立成臣不愧枚皐陛下何惜玉階
前方寸地不使臣披露肝膽抑揚辭翰請陛下召天下
才子三五千人與臣同試詩策判牋表論勒字數定一
人在前疑作先者陛下斬臣頭粉臣骨懸於都市以謝
天下才子望陛下收臣才與臣官如用臣芻蕘之言一
辭一句敢陳於玉階之前如棄臣微見即燒詩書焚筆

硯獨坐幽巖看陛下召得何人舉得何士無任鬱結之至

為水潦災異陳情表

武后

李嶠

臣嶠言臣聞明主程才先求於稱職忠臣効用必務於量已然後庶官無廢百度以康若使假鳳登朝真龍不馭將綠鶴之鼎方憂於折足和鸞之駕必誠於傾軛豈徒鍾鼓生祆蠻夷起笑而已臣瓶筓賤器駕蹇輕姿同鼯鼠之五伎不成異飛鴻之六翮兼備遭逢幸會累叨

階級陛下降非常之澤垂不次之恩昇之冢司握九流
之銓管委以樞近叅萬幾之損益傳說作舟之命徒奉
箴規仲山補袞之談魯微答効致令衡鏡失序紀綱不
張官僚日增府庫歲減謬職之謗或譏於畫虎續貂敗
官之尤有議於誼盧吠鵠韓盧宋犬名
鵠或作鵠非下生朝野之蠹
上悖陰陽之和水潦為災慮深於昏墊黎氓失稔憂在
於溝壑軫皇情於南面墜國庾於西成虧燮理之則失
平分之度推其咎戾實在微臣昔者堯逢阻饑而四岳

咨訪漢遇災異而三公策免舉遺才而求俊又退不肖而清庶官厥有由來著于古昔臣緝熙莫効尸曠無成以擁腫之凡材抱支離之痼疾久懷致寇之祿猶帶妨官之綬覲目而視不遑自安是用啓處慚惶寢興誠惕思解鷄鵠之服願辭鵷鷺之行庶得保愚公之廬避賢者之路以寧衆口之囂謗以答三靈之譴咎則物情朝序誰不謂宜昔干木辭第恒思衛生營平寢瘵不忘憂國當今兵戎未靜費務方多人庶空虛官僚苟且不可

不深為防慮妙思政術臣銜恩佩德念咎慙榮雖智効
無聞自甘於罷黜而庸短所見猶樂於輸畫不勝區區
之意謹昧死陳利害事一封幸當明主不諱之朝敢効
愚臣無隱之節倘蒙赦其狂直收其固陋乃冀有益纖
芥効添山海無任悚懼懇誠之至謹詣朝堂奉表陳情
以聞

為任虛白陳情表

吳少微

臣某言臣亡父某昔在聖朝累蒙進任亟登麟閣績校

秘丈衛迹鳳池翊謀神化內陳青瑣之拜出有朱輪之
寵何其休哉而恩榮未報覺禍潛起闔門而就拘連頸
而待戮陛下發雲輅

一作雲霓
或作雲蛻

之彩迴霜電之威捨過

好生全棄嶺表一蒙渙汗欣借命之恩萬里奔波無乞
骸之望竄身邊裔皓首荒隅以臨年之危坐炎方之瘴
雖欲勿死其可得乎遠謝闕庭奄先泉路旅襯期朽今
猶未還興言血下號懼交集臣某中謝陛下通天之歲
復降恩勅追魏某崔某及臣亡父等赴都元忠或入處

台相出臨藩牧門庭曜軒組之榮妻子厭梁錦之美其
李乙雖死亦蒙贈官子某又登微一作顯職惟臣一門之

内存亡俱不霑恩臣之不天亦胡顏上訴然比生則孤
臣豈敢同死則存李獨優皇天平分豈其偏施伏惟皇
帝陛下惠育羣生無幽不燭臣之孤苦皇天所鑒父終
嶺外喪在關中宇宙雖廣無一廛之地弟妹幼稚絕斗
舂之儲兩樞雙鳧未遑安厝臣所以鯁情割懇忍而未
死者竊為此耳倘雲雨之賜復潤無私則南有歸來之

菟北無高堂之位臣之幸也不任崩迫之至謹奉表以
聞輕觸宸嚴伏知待罪

陳情表

玄宗

張文成

開元初

萬死糞土臣文成言臣忝朝班幸蒙驅策不了一使罪
應至死自可鉗口吞聲伏待刑書灰身粉骨甘從斧鉞
豈可昆蟲惜命雀鼠貪生區區微心有所未盡臣平生
好學頗愛文章雖不逮於詞人濫流傳於視草近來撰
集詩賦表記等若干卷編集擬進繕寫未周負譴明時

方從極典恐士衡止息華亭之淚不聞嵇康顧影廣陵
之音永絕缺簡零落抱痛幽泉昔司馬遷請就腐刑以
終史記漢武帝愍其至懇矜而許之伏願陛下遂臣萬
請之心寬臣百日之命集錄繕寫奉進闕庭微願獲申
就死無恨然則歸罪廷尉肆諸市朝腰領橫分有同仙
化一作苑肝腦塗地百代如生骸骨埋塵千載不朽無任
迫切之至

陳情表

已見五百七十九卷

張說

第二表

已見五百七十九卷

前人

同前

蘇頌

臣某言臣伏奉今月十三日制鑾駕閏九月十日幸長安陛下東封禮還西賓係望顯顯品物不獨耆老屬黃壤年豈翠華時邁制書爰降懇願咸達相聚忻躍不知所裁跡誼路衢聲溢歌頌若臣者奉辭軒屋縈疾鎬京常恐先犬馬填溝壑朝聞既獲瞑目猶生臣某誠歡誠喜頓首頓首死罪死罪臣彌曠旬深官曹事缺乞解見

職罄陳前表又伏奉今月五日勅以番司務閑不妨醫
療所請辭官不須者臣志不動天身何容地周章慙悸
惶駭戰慄退則恩被羽翼德均造化臣之不敢止也進
則匍匐罕遂支羸蕭然臣之不能任也臣所進退失守
涕洟嗚咽宜其重請骸骨豈可虛榮省署竊以鴻私俾
療成貸特矜日夜翹清蹕之途炎涼近素秋之節臣希
眇視跛履手足之覬憑渥以還魂輒延慈而待罪不
勝悚踴怖懼之切謹附起居使朝議郎右補闕內供奉

臣李鄰奉表以聞臣無任

初至益州上訖陳情表

臣某言奉辭闕庭馳詣州府以某月日上訖臣某中謝
臣稟識愚妄受恩忝越十有四年中書省三命承明廬
臣竊比方倍逾於是特編皇揆不以人進久於近密衆
莫過臣厚施如丘山微功罕絲髮遂叨宰弼莫允瞻望
心慮何補血誠徒勤陛下深慈矜愚至德念舊以臣頗
習儒訓更超宗伯臣益用慙負匪遑底寧豈悟西南重

鎮巴蜀粵壤爰雜縣道且聯軍戎付臣魚之才實不逮

審

疑作竊

自能省亟經聞徹誠謂憑威可盡力諭指期致

命臣敢辭事誰云効忠及當官而行臨事益懼者竟乏
邊鄙之筭倘貽朝廷之辱其於靜人蠲役懲吏抑強惟
國之政庶臣能勉流波出浦而嗚咽玄鷺辭巢而顧慕
况若臣者最蒙聖渥雲山萬里霄漢獨遠載惕拜章失
圖無任

辭上滑州刺史陳情表

李 邕

臣某言臣素無藝能積負訕謗衆口之多自可銷金怨
讐之心每堪殞首伏惟陛下至明大聖察之纖微淳德
上仁洗之瑕穢山川納者不擇薰蕕天地覆之是霑雨
露且久荷惠渥大底官榮今臣蒙國用累及軀命事出
涯分之外恩加父母之深已逝之魂復歸朽質既存之
地更忝高班雖欲殺身未能報德彌慚持祿有以保名
秋鷺將辭必徘徊於大厦老馬離秣終顧步於華軒况
臣今茲六十有七光陰荏苒行止敬危就木之時未知

幾日懸車之歲僅有三年不任遠涕戀之至

為崔僕射陳情表

代宗

于邵

臣某言臣聞行師命將必先保大服戎共武方議膚公
所以協和軍蒐戡定時難伏惟寶應元聖文武皇帝陛
下誕膺天命以撫方夏洪惟眷圖用征不諛上敬天授
下咨人力則殊方異俗固不率俾蠢茲西戎猶肆逆命
勞我薄伐示人有征夷不亂華自宜殄滅盈不可久神
亦禍淫天之道也臣近得上都所由報狀伏承受相府

元帥之寄領漁陽突騎之衆分邵土鎮守之師內無所
疑外無所怨上讓下兢禮合義均不為身謀同獎王室
此皆陛下明為元首德洽蓋臣夷吾必知其小大孔明
遂均於魚水不然豈同德度力偶俱無猜以此討戎何
戎不滅以此論道何道不平臣蒙國寵靈榮加九族功
慙白馬位達綠車每承聖敬日躋輒願殺身是効今日
之會實契丹誠無任感時悃欵之至謹遣某官奉表陳
情以聞

代高尚書陳情表

臣某言臣本凡才智畧無取因緣際會驟歷班榮分閫
尹京實為塵忝頃者鳳翔之日蕃漢憑陵臣嘗激勵羌
渾竟勦戎虜方將席卷永息邊虞旋奉德音遽令入奏
微誠莫展殃疊已鍾痛骨推心載崩載咽荼毒未幾起
復舊官累表陳乞不蒙允許及夫戎構禍憑陵京城陞
下授臣檢校刑部尚書都知元帥中軍兵馬使雖承恩
命未有軍行麾下之人纔盈數騎空懷赴難莫克使綏

仰天椎心伏增憤激不踰信宿便屬蒼黃未知鸞駕東
巡且欲荆襄陪扈累遭剽掠始達藍田更逢子儀留臣
計事招集亡散共收上都比至入城又奏臣往奔波險
阻契濶山川進慙將帥之臣退羞羈縻之僕顧惟狼狽
寢寐兢惶臣某誠惶誠恐稽首頓首死罪死罪今又亡
母在殯欲祔舊塋先遠戒期正當此月干戈之際寇盜
為虞小有不安永負生疑作母願終子道以奉亡靈倘
封樹有成雖隕越無恨伏望許臣畢事之日得令奔走

陝郊碎首行間甘心罪責無任兢惕屏營之至

為趙侍郎陳情表

臣某言臣以固陋累蒙獎擢猥廁朝列與羣賢並始自給事驟遷侍郎贊貳冬官典司邦教屬師旅之後庶政從權會府舊章多所曠廢惟禮部兵部度支職務尚存頗同往昔餘曹空間案牘全稀一飯而歸竟日無事此臣所以寢興長想俛仰增慙何則受恩至深報德無所未裨毫髮虛費稻粱伏以人君命官期於述職人臣量

力不叨非據寧有食君上之祿為保妻子之謀臣內顧
塵忝尤增愧懼頃陛下躬決庶務萬方不言而理遠近
承式幸當天下無事未敢上塵其愚今承嗣背德阻兵
全魏靈曜失道謀亂大梁犬戎為患獯虜伺隙雖禍盈
惡稔終異梟夷而調兵轉粟在彼疲弊乃羣下憂國之
日微臣赴難之秋况諸道牧守闕人頗眾是敢不揆薄
劣特祈任使如或領一郡或統數城綏懷將卒招復逃
散近當狂寇俯制奔衝必使人業耕桑盜無充斥昔子

建之表愁求自試充國之對無踰老臣豈徒冒寵干榮
實欲酬恩立節臣年甫知命筋力猶強策勵駕蹇庶成
萬一無任懇悃迫切之至

文苑英華卷六百一

欽定四庫全書

文苑英華卷六百二

宋 李昉等 編

陳情二

自叙
附

為河南魏尹謝官陳情表一首

劉相請女婿潘炎罷元帥判官陳情表一首

謝試祕書少監陳情表一首

為崔大夫陳情表一首

為王戶部叔丈陳情表一首

為崔相陳情表一首

為濮陽公陳情表一首

自叙表一首

出官後自叙表一首

為河南魏尹謝官陳情表

代宗

常袞

廣德元年

臣少遊言伏奉恩制除某州刺史尋即有替又蒙恩除

臣河南

唐書作京兆是

尹澤及遐荒榮霑枯朽以驚以惕載忭

載歡臣少遊誠歡誠喜頓首頓首臣名無德稱官偶時

來政謝有經文慙無害朝恩早竊班命累塵每食皆浮
何官不曠四三年內榮至崇高萬一分中効仍微薄踰
涯若此招損宜然頃者獲罪于天躋身無地曲承鴻霈
仍佐隼旟省揆責輕寢興憂負豈圖招洗瑕穢發生羽
毛不次之恩九霄橫落無階之位四裔超登開散皇明
龍銜巨燭捧酬玄造黿戴崇山且河洛軍與疑作京尹
寄切念臣術非鈎鉅識昧平反將何以肅清姦回董正
人吏自蒙獎擢願覲天慈限以阻脩未承勅命傳聞尚

感

疑作感

奔赴終勤以七月一日發自渠州星言即露久

冒炎瘴因成癘疔行役支離轉加沉瘵隙光是迫草露
將危今月四日乘輿至漢中尋問醫藥直省王許佺至
奉宣進止促臣行程震威俯臨精魂飛散進退無措屏
營失圖即以今日驅策殘骸載馳鳳閣猶冀獲全餘喘
祇謁龍顏犬馬之疾久纏螻蟻之誠愈結無任感戴懇
迫之至謹因直省王許佺迴謹奉表陳謝以聞臣少遊
誠惶誠恐頓首頓首謹言

劉相請女壻潘炎罷元帥判官陳情表

代宗

王諫

臣晏言臣實凡淺謬典樞衡元元未安庶政多闕消塵
罕錄尸素空慙臣女婿元帥判官駕部員外郎知制誥
潘炎入侍幃幄又司戎政嫌疑之地顛沛是憂頃者累
表陳聞異炎得歸省闈不謂天聽未達尚阻愚誠內懷
水炭若墜泉谷臣某誠惶誠恐臣聞統天下者以天下
舉直錯枉不私其親故能啓至公之門塞羣邪之路伏

惟元聖文武皇帝陛下紹休聖緒惟新寶歷內釐百揆外清四海鵷鸞之士充庭漸階而臣與潘炎俱忝近密兵權國政在臣二人是使惡炎者易為辭嫉臣者易為毀倘炎獲戾臣無以見雪脫臣遇謗炎無以自明此臣所以寤寐兢惶罔知攸止昔霍光為大司馬長女婿度遼將軍范明友次女婿羽林監任勝為東西宮衛尉威勢崇重冠於一時不能抑退卒見傾覆前史所惡書而貶之又劉弘為鎮南將軍事時朝廷以其女婿夏侯陟

為襄陽太子弘表陟親戚舊制不得相監有詔聽從竟
免禍敗先賢所尚美而書之臣雖才謝古人智不經遠
每憂覆餗大懼妨賢竊惟瓜李之嫌寧望桑霍之許一作
訴今是以瀝肝上請昧死聞天必元帥藉炎諮謀則臣
甘引退如或廟堂留臣擇用伏願終許罷炎庶遂劉弘
之心無成子孟之禍無任懇願迫切之至

謝試秘書少監陳情表

蕭華

臣某言伏奉制書以臣試秘書少監恩出意表榮超望

外臣循涯揣分以慙以悚臣華中謝臣素庸懦又乏智謀進不能殺身以自明退不能拂衣以遠禍蒙昧昏虐僂俛歲時每讀李陵之書備見前賢之意以為虛死不如立節成名不如報德常恐溘先犬馬湮沒羯胡上負君親之恩下貽妻子之恥何嘗不仰南雲而歎息瞻北闕而銷魂偷生苟安蓋所以誓將骸骨歸死朝廷伏願陛下察以愚衷每垂保護遂得潛通間使遠詣官軍收金州而功不踰時掃餘孽而兵無血刃陛下矜臣一介

之節捨臣萬死之罪念臣簪履之舊納臣葵藿之誠許
歸故國之田園退守先人之墳墓則在臣之志願榮望
畢矣陛下之聖恩於臣深矣豈期皇慈廣被玄造曲成
拔臣於泥滓之中致臣於雲霄之上已蒙殊獎遽典雄
藩旋沐厚恩復登蓬閣空慙有命竊愧無能將何以發
揮儒林潤色鴻業稠疊恩意感戴難勝豈臣墮越所能
上報無任悚荷屏營之至

為崔大夫陳情表

代宗

李舟

臣某言臣素以庸虛百無所取肅宗委臣方面擢尹兩京蓋以天寶末年祿山干命臣未有職位客遊陳州賊兵過河官吏奔竄臣義集驍勇亟推賊鋒以問閭之人當幽薊之卒勢相懸倍不顧死亡臣之輕生實著誠素今者回紇代立求援聖朝陛下大布皇威如其冊禮爰膺將命實受寵光又其道路無虞夏一作虜帳尤近擁旄仗節持憲珥貂銜非常之詔書寵內附之蕃落去獲重貺歸成大勲雖潦倒之人衰朽之士亦宜據鞍增氣叱

馭前驅况臣常在軍戎未至遲暮豈不欲保微臣之富
貴求陛下之恩私哉其理必至顛沛必至廢闕隱而不
露何以事君臣往在宣州曾卒得癩疾三日三夜都不
知人自此已來發無時候或輕或重或疾或遲此病所
來得於風熱常因冒暑失食及冬衣太溫兼食羊肉立
即發動若過磧之後更無菜蔬苦寒之地須加狐貂又
於藥物不得及時則微臣不得全活且螻蟻之命誠何
足言但恐敗事有失前期稽恩廢禮伏願陛下以臣此

表徧訪朝臣言若涉虛事近辭避伏願加以斧鑕肆諸市朝且使將來永息欺詐無任哀懇迫切之至

為王戶部叔丈陳情表

柳宗元

臣某言臣母劉氏今月十三日忽患暗

集作音

風發動狀

候非常今雖似退猶甚虛憒驚惶憂苦不知所圖臣惟一身更無兄弟侍疾嘗藥難闕須臾伏乞聖恩停臣所職今臣見在家扶侍其官吏等並已發遣訖臣以庸微特承顧遇拔自卑品委以劇司夙夜驚惶惟思答効至

誠至懇天聽所知豈慮未効消塵遽迫方寸以開塞重

輕之務加焦勞皇

集作憂

惕之懷雖欲徇公無由枉志况

忠孝同道臣子一心許國誠切於死生報親忍忘於顧

復進退窮蹙昧死上陳候母劉氏疾疢小瘳冀微臣駕

蹇再効無任惶懼懇倒哀鳴

類表作嗚咽

之至

為崔相陳情表

白居易

臣植言臣有情事久未敢言今輒陳露伏增戰缺臣亡

父某官亡妣某氏是臣本生亡伯某官某贈某官臣今

承後建中初德宗皇帝念臣亡伯位高無後以猶子之

義命臣繼紹仍賜臣名嗣襲雖移孝思則在上荷君命

俾

集作永

承繼絕之宗中奪私恩遂阻劬勞之報歲月曠

久情禮莫申自去年以來累有慶澤凡在朝列再蒙追

榮或有陳乞皆許迴授况臣猥當寵擢謬陟台階爵祿

之榮實有踰於同輩顯揚之命獨未及於先人飲泣茹

悲哀慙兩極臣今請以在身官秩并前後合叙勲封特

乞聖慈迴充追贈倘允所請無幸於斯則臣烏鳥之心

猶再生而展養犬馬之力誓萬死以酬恩踏地仰天不
勝感咽披陳誠懇煩黷宸嚴無任惶懼激切之至謹奉
表陳露以聞

為濮陽公陳情表

李商隱

臣某言臣聞事君以忠者所宜劾死食君之祿者亦戒
妨賢苟非內慊私誠外憂官謗則安肯固辭武節強委

侯集作信

圭拒七命賜國之榮捨萬里封侯之策必知不

可安敢無言臣其中謝臣因緣代業遭逢

集作過

聖時竊

常

集作嘗

有志四方不掃一室奉隋武之家事無愧陳辭

慕鄧傅之門風不傷清議屬者每愛不試深恥因媒自

薦之書朝投象魏殊常之澤暮降芸香其後契濶星霜

羈離戎旅從軍王粲徒感所知掌檄陳琳亦常交辟呂

元膺東周保釐之日李師古太平畔

集作叛

渙之時潛入

其徒盈於留邸臣此時尚持白簡猶着青袍元膺知臣

傳劔論兵本於仁信佩鞬挿羽亦識孤虛俾以發姦假

之捕盜幸無容忍以及焚巢旋帶銀章俄分竹使隼旗

楚峽出以分憂熊軾鄖城忽然通貴豈意復踰五嶺更
授再麾中間叨相青宮忝司緹騎纔通閨籍又處藩條
越井朝臺備經艱險貪泉涓水益勵平生是甘馬革之
言常懼虎皮之誚及聖造遠流南極許拱北辰黃犢留
官胡牀掛柱如生羽翼若出嬰羅誓以歸彼冗員處之
散地俄以朝那闕守昆壤須人一去闕庭五罹寒燠處
京畿五百里之內控番寇數十州之多提鼓燒烽增埤
濬洫雖國家遠追集作上策不事交爭然虵豕難防犬

羊易縱苟罷嚴徹警則負約渝盟臣自受命以來為日
斯久未嘗一日不修戰格未嘗一日不數軍儲使士有
鬪心人無虛額使之偵候咸亦聞知尚未能率勵驍雄
揣摩鋒鏑遠收麻壘直取艾亭成大朝經武之威畢微
臣報主之分可書竹帛不辱旂常盖以久處炎荒備薰
瘴毒內搖心力外耗筋骸雖馬援據鞍尚能矍鑠而班
超攬鏡不覺蕭衰恐無以早就大功久當重任自思已
熟求退為宜伏惟皇帝陛下道冠百王功高三代照臨

若日覆露如天况今國不乏人時稱多士有才畧在臣
之右齒髮少臣之年俾代處是邦遞臨斯位以之責劾
誰曰不然俾前達後生皆無蔽滯由中及外得以交相
成陛下適時之方減微臣固寵之責臣不勝祈懇懇迫
之至謹差某官某奉表以聞

自叙表

李嶠

臣嶠言奉今月十七日口勅令臣等各自述行能進者
臣以蒙鄙遭逢休歷陛下降非常之遇垂不次之恩擢

處崇班超登近侍上感皇明識遇之厚下憂忝冒負乘
之責常願肝腦塗地以報所天魂魄歸泉不忘結草至
於欲披誠款曲盡智能竭心本朝輸力明主此臣日夜
之所思念冒襟之所蓄積豈敢更為進退苟事廉隅固
守撝謙坐飾邊幅臣早邁凶閔素甘賤貧少纏羸疴不
任勞苦從仕代饑寒之役徇祿無顯達之心脩身懼於
辱先履道期於遠害見強禦之為患也故處之以謙卑
知刻薄之為尤也故行之以仁恕慕退讓不敢從馳競

之流戒貪殘不敢為絲髮之犯若乃溫良誠信之道忠
孝友悌之規莫不仰承聖風俯蹈家訓采太平之名教
移中人之志業及其屏私昵忘比周內無術數之機外
絕朋附之黨一心奉主介然孤立此臣之所以登朝廷
而事明聖全直道而勗身名者也人臣事君有死無二
見危則致其命當事則先其勞有罪不敢辭有能不敢
隱是以西戎不靜充國自銜其謀南越未賓終軍思赴
其難臣幸蒙採擇得備驅馳若使飾固陋之心竭篤蹇

之用勉之以匪懈將之以至公則雖簿領百端樞衡衆務亦淺深而必効何難易之敢辭哉蓋明主程才以建官忠臣量已以受職是故輪轅異適水火殊用當其材則事逸而功倍乖其分則形勞而績虧陛下棄短收長循名責實使得効其薄伎申其末用則臣之淺術可得而言臣曾涉經典篤好文史漸六藝之腴潤馳百家之間闕至若操觚秉牘紀事屬辭雖竊比老彭誠未擬於先哲而上追班馬敢自強於後進陛下以欽明撫運齊

聖握圖冠千齡而首出超百王而高視德澤汪濊典章
明密至道共八風俱翔神功與四時並運是以衆庶悅

豫符瑞盼蠻九服清夷百蠻職貢而高高梁父未循

疑作

修昭報之壇禮官儒林不輯昇平之頌使鴻名有時而
鬱良史靡得而稱臣竊懼焉昔成康之隆頌聲並作武
宣之盛文章間起虞德茂而臯繇作歌魯道興而奚斯
有述然後功業顯乎代德音昭乎聲若夫保馭中和憲
章大雅通諷諭之旨抒嗟歎之懷此臣子之舊經國家

之前式不可闕也臣幸得沐浴恩造扶持軒墀目覩邕
熙心積憤懣思陳愚瞽庶存萬一徒以牽迫賤事卒卒
無須臾之閑頓伏虺羸軋軋多沉滯之恩常恐犯霧露
填溝壑不獲贊揚上德攄布下情生為負義之人死為
孤恩之鬼是用終朝三省達夜九迴撫心刻意屏營反
側倘得叅名芸閣假跡蓬山探石室之秘文覽金版之
遺籍聽歌探頌以觀四方之風講藝論詩以崇三代之
式第其科目載之簡編大以薦陳郊廟報享成功小以

敷布樂章潤色鴻業使宏勲播於金石盛德流乎舞詠
光濟於當日澤被於來葉然後退沒草澤下入幽泉猶
生之年也冒陳愚懇惟我陛下察焉臣嶠誠惶誠恐頓
首頓首

出官後自叙表

德宗

齊映

臣某言伏以臣之依君猶子之依父若心有憂患口不
陳聞則是孤負恩慈自取禍敗臣某中謝臣去八月十
九日陛下賜臣蔭官詔云漕運成功擢居東掖者臣俯

慙光寵上感聖明粉骨糜軀匪申報効臣昨當都主運之日是上都闕糧之時賊光未平蝗蟲方甚臣於河陰領米分付陝州務相催驅不敢迴避其時王事至切臣官最卑臣心雖守謙恭公事亦多抵牾猶蒙陛下遣段日暹宣慰於臣處事之難臣有微功實由天庇及臣延英對日不敢一言自陳怒臣者疑臣以張身勢憂臣者料臣必投魑魅今臣貶官自緣親累聖恩猶與上州自然宿怒未平因恐小人承便臣既在遠還固易誣痛則

呼天實在今日憂之切者謹陳一端往者張鑑在鳳翔之時奏留都營田副使張信之得罪自為犯賊以臣不與往還於臣便生疑怨一昨秋夏之際張信之多在上都自臣貶黜已來不知今向何處但慮知臣在近又知執政恠臣必恐求媚取容構虛逞怨倘有罪戾聞於聖聽乞降三司審推則臣萬死無恨方當黜責猶恃恩私仰望天顏實如咫尺無任憂迫恃恩之至

文苑英華卷六百二